



SVEUČILIŠTE / UNIVERZITET "VITEZ"

VITEZ

Poslovni centar Vitez 96-2, Vitez

Rektorat; Poslovni centar Vitez 96-2, Vitez

Menadžment, Finansijska služba; Školska 23, 72270 Travnik, Bosna i Hercegovina ;
Studentska služba i Nastavna služba; Školska 23 72270 Travnik, Bosna i Hercegovina,
www.unvi.edu.ba

P R A V I L N I K

o disciplinskoj i materijalnoj odgovornosti studenata

Na osnovu osnovu člana 185. tačka c) Statuta Sveučilišta/Univerziteta "VITEZ" Vitez, Senat Sveučilišta/Univerziteta na 30. sjednici održanoj dana 15.10.2012. godine donosi slijedeći:

P R A V I L N I K
o disciplinskoj i materijalnoj odgovornosti studenata
na Sveučilištu/Univerzitetu "VITEZ" Vitez

I OPĆE ODREDBE

Član 1.

Ovim Pravilnikom reguliše se disciplinska i materijalna odgovornost studenata na Sveučilišta/Univerziteta "VITEZ" Vitez (u daljem tekstu Sveučilište/Univerzitet), a naročito: povreda obaveza (discipline) studenata, disciplinske mjere i naknada štete, pokretanje i provođenje postupka utvrđivanja odgovornosti, rokovi, evidencije i druga relevantna pitanja.

Član 2.

Odgovornost, iz ovog Pravilnika može biti:

1. Disciplinska usljed povrede obaveze (discipline) studenata, i
2. Materijalna (naknade štete), kada je šteta prouzrokovana

Odgovornost iz stava 1. ovog člana temelji se na krivici učinioca (subjektivna odgovornost)

Član 3.

Postupak utvrđivanja odgovornosti je hitan.

Postupak utvrđivanja odgovornosti je javan, osim u slučajevima kada interesi studenta i javnog morala zahtijevaju isključenje javnosti o čemu odlučuje Rektor Sveučilišta/Univerziteta (u daljem tekstu Rektor)

Član 4.

Stručno – tehničke i administrativne poslove vezane za disciplinsku odgovornost i prouzrokovanje štete od strane studenta obavlja služba za pravne i personalne poslove Sveučilišta/Univerziteta.

Član 5.

Ukoliko određeno pitanje nije riješeno ovim Pravilnikom, supsidijarno se primjenjuju:

1. Opšta pravila o kaznenoj i imovinskoj odgovornosti, i
2. Pravila o Zakonu o upravnom postupku

II DOMEN PRIMJENE PRAVILNIKA

1. Lice sa statusom studenta

Član 6.

Pravilnik se primjenjuje na fizičko lice koje na Sveučilištu/Univerzitetu ima status:

1. Redovnog i vanrednog studenta dodiplomskog studija
2. Studenta na postdiplomskom studiju za sticanje naučnog stepena “magistra ”

Status studenta dokazuje se javnom ispravom koju izdaje Sveučilište/Univerzitet i odgovarajućim evidencijama koje vode Službe za rad sa studentima i Služba za nastavu Sveučilišta/Univerziteta.

2. Lice koje nema status studenta

Član 7.

Na lice koje, u smislu ovog Pravilnika, nema status studenta, a prekršilo je pravilo ili pravila vezana za studiranje koja su utvrđena zakonom, aktima Sveučilišta/Univerziteta, primjenjuju se opšta Pravila o krivičnoj i imovinskoj odgovornosti koja važe u Federaciji BiH.

Protiv lica iz stava 1. ovog člana Pravilnika, Sveučilište/Univerzitet podnosi prijavu nadležnom državnom organu.

III POVREDA OBAVEZA/DISCIPLINE STUDENATA

1. Opšta pozivanja na povredu obaveza/discipline

Član 8.

Student se može pozvati na odgovornost u slučaju prekršaja (povrede) pravila koje je utvrđeno Okvirnim Zakonom o visokom obrazovanju BiH, Pravilima Sveučilišta/Univerziteta, odlukama organa upravljanja i odlukama Nastavno-naučnog vijeća Sveučilišta/Univerziteta, makar taj prekršaj i nije izričito predviđen kao lakša ili teža povreda obaveza studenata.

2. Teže i lakše povrede obaveza/discipline studenata

Član 9.

Težim povredama discipline, smatra se:

- Prepravka ili dopisivanje podataka u ispravi, dokumentu ili evidenciji koju izdaje, odnosno vodi Sveučilište/Univerzitet, ili falsifikovanje iste;
- Korišćenje nedozvoljenih načina pri polaganju ispita;
- Krađa ili namerno uništavanje imovine Sveučilišta/Univerziteta, zaposlenog ili studenta;
- Dolazak ili prisustvo na Univerzitetu pod dejstvom alkohola ili narkotičkog sredstva te unošenja i distribucija istih;
- Neovlašteno bavljenje oblikom privredne djelatnosti na Sveučilištu/Univerzitetu;

- Vrijeđanje ili kleveta zaposlenog na Sveučilištu/Univerzitetu ili studenta;
- Onemogućavanje zaposlenog na izvršavanje svojih prava i obaveza, ili ometanje nastave, ispita i drugih oblika rada na Sveučilištu/Univerzitetu;
- Odbijanje ili nepostupanje po izričitom uputstvu ovlašćenog lica na Sveučilištu/Univerzitetu u ili organa Univerziteta u vezi sa pravilima rada ili korišćenjem imovine Sveučilišta/Univerziteta;
- Dovođenje u zabludu zaposlenog na Sveučilištu/Univerzitetu ili organa Sveučilišta/Univerziteta, u namjeri da se ostvare prava i pogodnosti ili imovinska korist;
- Fizički napad na zaposlenog ili studenta, ili izazivanje tuče na Sveučilištu/Univerzitetu;
- Iznošenje i pronošnje, putem sredstava javnog informisanja i na javnim skupovima, neistinitih tvrdnji kojima se nanosi šteta ugledu Sveučilišta/Univerziteta;
- Izvršenje krivičnog djela ili prekršaja na Sveučilištu/Univerzitetu, koji studenta čini nepodobnim za studiranje;
- Težom povredom smatra se tri ili više puta ponovljena lakša povreda.

Lakšim povredama discipline, smatra se:

- Nedoličan odnos prema zaposlenom i studentu;
- Nepoštovanje kućnog reda na Sveučilištu/Univerzitetu;
- Ometanje nastave, ispita i drugih oblika rada na Sveučilištu/Univerzitetu, manjeg obima;
- Oštećenje ili uništenje imovine Sveučilišta/Univerziteta manjeg obima, ili nesavjestan odnos prema imovini Sveučilišta/Univerziteta;

3. Svojstvo u izvršenju povrede obaveze/discipline

Član 10.

Povredu obaveze/discipline student može učiniti u svojstvu:

1. Izvršioca ili suizvršioca (više lica),
2. Podstrekača,
3. Pomagača i
4. Prikrivača.

Svojstvo i stepen krivice (krivnje) u izvršenju povrede obaveze utvrđuju se u postupku.

4. Mjesto izvršenja povrede obaveze/discipline

Član 11.

Povreda obaveze/discipline može biti učinjena:

1. U bilo kojoj prostoriji u zgradi ili zgradama Sveučilišta/Univerziteta ili u neposrednoj blizini zgrade Sveučilišta/Univerziteta;
2. U prostorijama ili ispred prostorija u kojima se izvodi nastava;
3. Na svakom drugom mjestu, ako se preduzetim radnjama narušava ugled Sveučilišta/Univerziteta, drugog studenta ili studenata, nastavnika i saradnika ili nekog iz nenastavnog osoblja Sveučilišta/Univerziteta (na pr. Iznošenje neistinitih informacija, podataka);
4. Na svakom drugom mjestu, ako se preduzetim radnjama namjeravalo steći neko pravo na protupravan način ili protivpravna imovinska korist (npr. falsifikovanje javne isprave koju izdaje Sveučilište/Univerzitet et).

5. Vrijeme izvršenja povrede obaveze/discipline

Član 12.

Povreda obaveze/discipline učinjena je u periodu dok lice ima status studenta.

6. Primjena pravila na prouzrokovanje štete

Član 13.

Pravila iz Člana 7 do 12. ovog Pravilnika shodno se primjenjuju i na slučajeve prouzrokovanja štete.

IV DISCIPLINSKE MJERE I NAKNADA ŠTETE

1. Disciplinske mjere

Član 14.

Disciplinske mjere za povredu obaveza/discipline su:

1. Opomena, koja se izriče za lakšu povredu obaveza;
2. Javna opomena, koja se izriče kada je student istovremeno učinio više lakših povreda obaveza ili je više lakših povreda učinio u kratkom vremenu; i
3. Isključenje sa Sveučilišta/Univerziteta u trajanju od jedne (1) do tri (3) školske godine ili trajno a izriče se za učinjenu težu ili teže povredu obaveza/discipline;
4. Zabrana polaganja ispita.

2. Princip individualizacije

Član 15.

Prilikom izricanje mjere uzimaju se u obzir, naročito: motivi iz kojih je povreda obaveza/discipline učinjena, posljedice koje je izazvala povreda, način izvršenja povrede obaveza, ranije ponašanje studenata, kao i njegovo ponašanje poslije učinjene povrede obaveza/discipline.

3. Naknada štete

Član 16.

Odgovornost iz osnova prouzrokovanja štete postoji, ako je radnja učinjena namjerno ili iz krajnje nepažnje.

Naknada prouzrokovane štete obuhvata prostu (stvarnu) štetu u visini stvarnog oštećenja, uključujući i odgovarajuće troškove.

4. Kumulacija sankcija

Član 17.

Odlukom o izricanju disciplinske mjere određuje se i iznos naknade štete, ako je šteta prouzrokovana.

5. Šteta učinjena drugom licu

Član 18.

Ako je student prouzrokovao štetu na imovini ili ličnom dobru drugom licu, Sveučilište/Univerziteta ne odgovara za štetu.

V POSTUPAK ZA UTVRĐIVANJE POVREDE OBAVEZE/DISCIPLINE I NAKNADE ŠTETE

1. Prijava

Član 19.

Prijavu o učinjenoj povredi obaveze/discipline i prouzrokovanju štete, kada je došao do saznanja dužan je podnijeti:

1. Svaki student,
2. Svaki zaposlenik,
3. Rektor, po službenoj dužnosti, i
4. Svako lice koje je angažovano na Univerzitetu.

Prijava se može podnijeti pismeno ili usmeno, i sadrži naročito:

1. Ime i prezime studenta ili studenata koji su učinili povredu obaveza ili prouzrokovali štetu;
2. Njihovu bližu identifikaciju;
3. Opis radnje kojom je učinjena povreda obaveza/discipline ili prouzrokovana šteta uz navođenje mjesta, vremena i načina izvršenja; i
4. Dokaze (javnu ispravu, svjedoke, druge dokaze).

Prijava se podnosi Rektor.

2. Pokretanje postupka

Član 20.

Postupak za utvrđivanje odgovornosti pokreće Rektor, svojom odlukom u formi pismenog rješenja.

Rješenje Rektora o pokretanju postupka za utvrđivanje odgovornosti obavezno sadrži podatke iz člana 19. stava 2. ovog Pravilnika.

Rješenje o pokretanju postupka lično se uručuje studentu putem Protokola Sveučilišta/Univerziteta, uz obavezno uputstvo da može angažovati punomoćnika.

Prije donošenja rješenja iz stava 1. ovog člana, Rektor može odrediti da Služba za pravne i personalne poslove Sveučilišta/Univerziteta provede prethodne radnje u cilju provjere navoda iz prijave i pribavljanja dokaza.

3. Rokovi

Član 21.

Postupak za utvrđivanje odgovornosti studenta za učinjene povrede obaveza/discipline i prouzrokovanu štetu, ne može se pokrenuti niti voditi:

1. Za lakšu povredu obaveze/discipline, po isteku šest (6) mjeseci računajući od dana saznanja za učinjenu povredu ili prouzrokovanu štetu;
2. Za težu povredu obaveze/discipline, po isteku dvanaest (12) mjeseci računajući od dana saznanja za učinjenu povredu ili prouzrokovanu štetu.

Apsolutni rok zastare za utvrđivanje odgovornosti studenta za učinjenu povredu obaveze/discipline i prouzrokovanje štete jeste dvanaest (12) mjeseci, računajući od dana kada je učinjena povreda ili šteta prouzrokovana.

Ako učinjena povreda obaveze/discipline ima obilježje krivičnog djela (npr. falsifikovanje javne isprave), apsolutni rok zastare jeste onaj rok koji je krivičnim zakonom utvrđen za to djelo.

3. Zakazivanje rasprave

Član 22.

Rektor zakazuje raspravu za utvrđivanje odgovornosti za povredu obaveze/discipline i prouzrokovanu štetu.

Rasprava se zakazuje u prostorijama Sveučilišta/Univerziteta u toku radnog vremena.

Na raspravu se poziva student protiv koga je pokrenut postupak ili njegov punomoćnik i drugo lice čije je prisustvo neophodno.

Pismeni poziv za raspravu lično se uručuje studentu putem Protokola Sveučilišta/Univerziteta.

5. Održavanje (tok) rasprave

Član 23.

Usmenu raspravu vodi Rektor ili lice iz Službe za pravne i personalne poslove Sveučilišta/Univerziteta koje pismeno ovlasti Rektor (voditelj rasprave).

Rasprava se održava u prostorijama, na dan i u vrijeme kako je utvrđeno u pozivu za raspravu.

Rasprava se ne može održati, ako studentu protiv koga se vodi postupak, odnosno njegovom punomoćniku poziv za raspravu nije uredno uručen.

Usmena rasprava se odvija prema sljedećem redoslijedu:

1. Konstatovanjem prisustva pozvanih lica i utvrđivanjem njihovog svojstva (lice protiv koga se vodi postupak, svjedok, vještak, zapisničar i dr.);
2. Čitanjem prijave iz člana 19. ovog Pravilnika;
3. Davanjem izjave od strane studenta protiv koga se vodi postupak;
4. Provođenjem dokaznog postupka: uvidom u javne isprave, saslušanjem svjedoka uvidom u odgovarajuće evidencije koje se vode na Sveučilištu/Univerzitetu, saslušanjem vještaka i dr;
5. Davanjem završnih izjava studenta protiv koga se vodi postupak, i eventualno, njegovog punomoćnika.

Rasprava se odvija postavljanjem pitanja i davanjem odgovora (kontradiktornost postupka).

Ako se rasprava ne može završiti na jednom ročištu, zakazuje se novo ročište, najkasnije za 15 dana.

6. Zapisnik

Član 24.

Na raspravi se vodi zapisnik u koji se unose svi relevantni podaci vezani za tok rasprave iz člana 23. stav 4. ovog Pravilnika.

Zapisnik vodi lice koje odredi Rekor iz Službe određene članom 4. ovog Pravilnika.

7. Dostavljanje odluke

Član 25.

Odluku, kojom se odlučuje o disciplinskoj mjeri i naknadi štete, donosi Rektor u formi pisanog rješenja, najkasnije osam (8) dana nakon zaključenja rasprave.

Rješenje iz stava 1. ovog člana sadrži, naročito:

1. Ime i prezime studenta protiv koga se izriče mjera i podaci o njegovoj identifikaciji,
2. Opis učinjene radnje, mjesto, vrijeme i način izvršenja
3. Vrstu disciplinske mjere i iznos naknade štete ako je student proglašen krivim,
4. Obrazloženje rješenja,
5. Pouku o pravnom lijeku i rok za podnošenje žalbe, i
6. Potpis Rektora i pečat Sveučilišta/Univerziteta, sa brojem i datumom rješenja.

Ako je student oslobođen od odgovornosti ili je postupak o utvrđivanju odgovornosti obustavljen, u dispozitivu rješenja se navodi izreka o tome uz sve ostale elemente iz stava 2. ovog člana.

Rješenje iz stava 1. ovog člana uručuje se lično studentu putem Protokola Sveučilišta/Univerziteta, ako je to moguće, u protivnom primijenit će se odredbe Zakona o upravnom postupku.

8. Žalba

Član 26.

Protiv rješenja iz člana 25. ovog Pravilnika student može, lično ili putem svog punomoćnika, uložiti žalbu Upravnom odboru Sveučilišta/Univerziteta, kao drugostepenom organu.

Žalba se ulaže, najkasnije osam (8) dana, računajući od dana prijema prvostepenog rješenja.

Upravni odbor može prvostepeno rješenje: potvrditi ili preinačiti ili poništiti, u cijelosti ili djelimično.

Odluka Upravnog odbora Univerziteta je konačna.

9. Primjena pravila o upravnom postupku

Član 27.

Na postupak utvrđivanja odgovornosti studenata primjenjuju se odredbe Zakona o upravnom postupku, ako u ovom Pravilniku nisu predviđena procesna pravila.

10. Evidencije

Član 28.

O izrečenim disciplinskim mjerama i naknadi štete vodi se posebna evidencija, koju ustrojava lice iz službe za pravne i personalne poslove.

Evidenciju iz stava 1. ovog člana u dosijeku studenta.

VI PRELAZNE I ZAVRŠNE ODREDBE

Član 29.

Ovaj Pravilnik donosi Senat Sveučilišta/Univerziteta na prijedlog Rektora.

Član 30.

Danom primjene ovog Pravilnika prestaje da važi Pravilnik o disciplinskoj i materijalnoj odgovornosti studenata od 25.06.2010.godine

Član 31.

Ovaj Pravilnik stupa na snagu osmoga dana od dana objavljivanja na oglasnoj ploči Sveučilišta/Univerziteta „VITEZ“ Vitez.

Izmjene i dopune Pravilnika vrše se na način i po postupku predviđenom za njegovo donošenje.

Broj:

Datum:

PREDSJEDNIK SENATA

Prof. dr Nikola Grabovac